



12. august 2011

UKA 2011/65

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matu-muuna saqummiuppara:

Illunut sanaqataaffiusunut aaqqissuussinerup atorunnaarsinnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut.

(Inatsisartunut ilaasortaq Niels Thomsen, Demokraatit)

Tungavilersuut

Inuiaqatigiittut imminut anguniagassinnikuuvugut inuiaqatigiinnik imminut napatittunik pilersitserusulluta. Tamanna malunniuppoq Namminersornerup eqqunneqarnerani junip 21.-iani 2009-mi. Namminersornerup eqqunneqarnerani pisinnaatitaaffialunnik pissarsivugut. pisinnaatitaaffinnut malittaapput pisussaaffiit. Namminersorneq pillugu kalaallit isumalioqatigiissitaasa aprilimi 2003-mi isumaliutissiissumminni nalunaarutigaa:

”Pisinnaatitaaffiit pisussaaffillu imminnut oqimaaqatigiinnissaanik Namminersorneq pillugu Isumalioqatigiissitani paasinnineq imaappoq namminersorneq aningaasarsiornikkut imminut napatinnermik tunngaveqassasoq. Aningaasarsiornikkut imminut napatinneq tunngaviusumik imatut paasineqassaaq inuiaqatigiit naalagaaffiup tapiissutaanik isumalluuteqarnerput annikilluartussasoq, naalagaaffiullu suliassanik allanik Kalaallit Nunaanni isumaginninnera annikillartuinnassasoq”. (Namminersorneq pillugu kalaallit qallunaallu isumalioqatigiissitaasa Kalaallit Nunaanni namminersornermik isumaliutissiissutaat, 2008: 522).

Piviusumi tamanna imatut iluseqarpoq, tapiissutit ataatsimoortut allanngoratik nangissasut, akit akissaatillu allanngoriartornerinut naleqqussarneqartarlutik. Isumaliortaatsip malittaa naleqquttoq tassaavoq, inuiaqatigiittut imminut pituttorsimagatta ataavartumik aningaasarsiornikkut siuariartorneq pilersissallugu.

Aningaasaqarnikkut siuariartorneq pisariaqartoq pilersikkumallugu pingaaruteqarpoq qulakkiissallugu, siuariartornissamat tunngavissat piunissaat. Aningaasarsiornikkut siuariartornissamat piumasaqaatini pingaarnepaat ilagaat, innuttaasut najungaqarfanni inuussutissarsiornikkut periarfissagissaarfiusuni suliffissaqarfiusuni najungassaqaarnissaat.

Ajoraluartumik ullumikkut piviusuuvoq, illoqarfanni annerni annertuumik najungassaqaarniernermut utaqqisoqarnera. Taamaalisoqarsimavoq piffissami sivisuallaartumi sanaartortoqartarsimammat eqqarsaatigineqarnani massakkut piffissami siunissamilu inuiaqatigiit agguataarnerat inuussutissarsiornikkullu soqutigisariaqakkat.

Paarlattuanik piffissap ingerlanerani periarfissagissaarsimavoq najungassanik sanaartorsinnaaneq eqqarsaatigineqaratik taaneqareersut inuiaqatigiinni ineriartornissamat atungassarititaasut

illuaqqajaanerillu. Tamanna naapertuilluarnerunanilu nammaqatigiinnerunngilaq. Killormulli politikkiuvoq inuiaqatigiinnik tapiissutinik isumalluuteqartunik piunnartitsisusaaq - Namminersornerup anersaavanut siunertaanullu akisussaaffeqarnerunissamut aningaasaqarnikkullu napatinnissamut uniuulluinnartoq.

Tamanna tunngavigalugu Demokraatiniit aaqqissuussisimaneq illunut sanaqataaffiusutut taaneqartartoq atorunnaarsinniarpaput. Tunuliaqut tassaavoq Inissialiormermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersoq. Peqqussutip § 50-ia naapertorlugu taarsigassarsiarititat erniaqanngitsutut akilersugassaannngitsutullu tunniunneqassapput, piffissami atuuffigisaminni ukiut tamaasa annertoqatigiinnik aningaasartaqartinneqarlutik appartikkiartuaarneqassallutik.

Taamatut aaqqissuussisimaneq Demokraatit tunissutitut isigaat. Assut naapertuilluannngitsutut nalilerparput annerusumik annikinnerusumilluunniit illut inunntut najungaqarfanni aaliangersimasuni najungalinnut imaluunniit aaliangersimasumik isertitalinnut tunniussorneqarnerat, massa nunap innuttaasuisa sinneri amerlanertigut illoqarfanni annerni najungassaqarnermut aningaasartuuteqartariaqartartut qaammammut 10-15.000 koruuninik namminneq piminni najungaqarusukkunik.

Oqariartuuterput tassaavoq inuiaqatigiit tapiissutinik isumalluuteqarfiusut qimakkiartornissaat. Inuiaqatigiinnik naapertuilluarfiusunik pilersitsissuugut, arlaannaalluunniit pisariaqanngitsumik ersoqatiginninngitsumillu tunissutinik pisaratik. Namminersorneq pillugu ataatsimiititaliarisuup aatsaat taamat ersaritsigisumik ersarissarpaa, pisinnaatitaaffiit pisussaaffiillu oqimaaqatigiisinneqassasut. Tamassuma piumasaraa tamatta inuiaqatigiit aningaasaataasa atornerat akisussaaffigissagipput. Taamaattumik inuit namminneq akisussaaffigisariaqarpaat namminneq najungaqarfigerusutaminnik toqqaasimanertik.

Pisortanut aningaasaqarnikkut allaffissornikkullu kingunerisassai

Siunnersuut aningaasaqarnikkut kinguneqassooq, pisariaqartussaammat Inissialiormermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersup allanngortinnissaa. Taamaattumik allaffissornikkut isumalluutinik immikkoortitsisoqassooq inatsisitigut piareersaannermut suliaqarnissamut, tamatumani tusarniaanerit il.il. Nalilerneqarpoq pisortanut aningaasaqarnikkut allaffissornikkullu kingunerisassai AC inuup ataatsip suliarisinnaasaata naatsorsornerat aappaa affaq 500.000 koruunit missaanik naleqassasooq. Illunut sanaqataaffiusunut aaqqissuussinerup atorunnaarsinnera piffissami Naminersorlutik Oqartussat aningaasartuutai 15 mio. kr.-nirik annikillisissavai, naleqqiuguk konto pingaarneq 89.72.12.

Inuussutissarsiornermut aningaasaqarnikkut allaffissornikkullu kingunerisassai

Namminersorlutik inuussutissarsionikkut ingerlataqartunut aningaasaqarnikkut sunniuteqarsinnaavoq. Aningaasaqarnikkut sunniutaasinnaasoq tassaasinnaavoq, sanaartornerup iluani namminersortut najungaqarfanni aaliangersimasuni annikinnerusumik suliaasaqalernerat. imaaliallaannarli ajornarpoq nalilissallugu aningaasaqarnikkut sunniutissaq namminersorlutik inuussutissarsiortunut. Alla aningaasaqarnikkut sunniutaasinnaasoq tassaavoq, najungaqarfinnik niuernerup najungaqarfanni, illunut sanaqataaffiusunut aaqqissuussinerup atuuffigisaani, periarfissaqalissammat missiliorlugu tuniniaaviit piumasaqaatai malillugit ingerlanissaq.

Innuttaasunut aningaasaqarnikkut allaffissornikkullu kingunerisassai

Innuttaasunut massakkut periarfissaasumik atuisinnaasunut aningaasaqarnikkut kinguneqassooq. Aningaasaqarnikkut sunniutissap annertussusissaa eqimattamut tassunga annertusinnaavoq. Pisup malitsigisaanik eqimattami pineqartut najungaqarfimminnut siunissami

akiliinerusalissapput, namminneq illortik pingerusukkunikku. Malungineqassooq, eqimattaq taanna eqqartorneqartoq inuiaqatigiinni annikinnerusuummat.

Illuatungaani innuttaasut, piginnaassuseqartitaanngitsut illunut sanaqataaffiusunut aaqqissuussinermik atuisinnaasutut siunissami akileraarutaat atorneqartarunnaassapput aaqqissuussisimanermut tapiissuteqarnermut. Tamanna naapertuulluinnarpoq kalaallit inuiaat akisussaaffimmik tingusinissamut kissaateqarnerannut, naleqqiuguk Namminersornerup eqqunneqarnera.

Taamatut oqaaseqarlunga siunnersuut Inatsisartunut suliarilluangassanngorlugu isaappara.